

U ovom broju, između ostalog, čitajte:

- **Hitne reforme fiskalnog i parafiskalnog sistema i povećanje produktivnosti za brži rast FBiH i BiH**
- **Održan sastanak rukovodstva UPFBiH sa privrednicima sa područja SBK**
- **Predstavnici UPFBiH održali sastanak sa ministrom komunikacija i prometa BiH**
- **Predstavljen projekat „Jačanje zaštite ljudskih prava u aktivnostima poslovnog sektora u BiH“ kojeg provode UPFBiH i UPRS**
- **UPFBiH: 40 polaznika uspješno završavaju obuku za zapošljavanje osoba sa invaliditetom na otvorenom tržištu rada**

Održana sjednica Upravnog odbora UPFBiH



Na sjednici Upravnog odbora Udruženja poslodavaca u Federaciji Bosne i Hercegovine, održanoj 22. aprila 2024. godine, članovi su za predstojeću redovnu sjednicu Skupštine UPFBiH usvojili Prijedlog izvještaja o radu UPFBiH za 2023. godinu, Prijedlog plana rada UPFBiH za 2024. godinu, kao i Prijedlog finansijskog izvještaja UPFBiH za 2023. godinu i Prijedlog finansijskog plana za tekuću godinu.

Također, usvojene su odluke o izboru verifikacione komisije, zapisničara i ovjerivača zapisnika, kao i Odluka o potvrđivanju delegata za XXI redovnu Skupštinu UPFBiH.

Predsjednik UPFBiH Adnan Smailbegović informisao je članove o ključnim prioritetima UPFBiH za tekuću godinu te naglasio da će se nakon zvaničnog dijela Skupštine održati i tematski dio na kojem će se razgovarati o fiskalnim i parafiskalnim reformama, propisima o minimalnoj plaći i uticaju smanjenja oporezivanja rada na javne fondove.

Hitne reforme fiskalnog i parafiskalnog sistema i povećanje produktivnosti za brži rast FBiH i BiH



Hitno donošenje novih fiskalnih zakona i smanjenje ili ukidanje parafiskalnih nameta, u cilju smanjenja cijene rada i rasterećenja poslovanja kompanija u Federaciji Bosne i Hercegovine, će omogućiti rast privrede, dijelom zaustaviti odlazak kvalificirane radne snage iz Bosne i Hercegovine i poboljšati uslove života svih građana. Ovo je istaknuto na XXI Skupštini Udruženja poslodavaca u Federaciji Bosne i Hercegovine kojoj su prisustvovali predstavnici zakonodavne i izvršne vlasti BiH, FBiH i kantona, međunarodnih organizacija, nevladinih organizacija i sindikata.



Adnan Smailbegović.

"UPFBiH će dati puni doprinos provođenju reformi na europskom putu Bosne i Hercegovine i sa predstavnicima nadležnih institucija će raditi na kreiranju strateškog i zakonskog okvira u segmentu fiskalnih i parafiskalnih propisa, tržišta radne snage i drugim pitanjima s ciljem poboljšanja poslovnog ambijenta i stvaranja uvjeta za bolji život građana", kazao je predsjednik UPFBiH

Prof. dr. Faruk Hadžić u svome izlaganju tokom tematskog dijela Skupštine UPFBiH naglasio je

da su reforme fiskalnog i parafiskalnog sistema nužnost, ukoliko želimo razvijati privredu i društvo u cjelini.



"Reforma fiskalnog i parafiskalnog sistema FBiH dugoročno neće ugroziti funkcioniranje budžetskih fondova kao što su Fond PIO/MIO i fondovi zdravstvenog osiguranja u FBiH", naglasio je prof. dr. Hadžić.

Pored neophodnih reformi kada su u pitanju porezi i doprinosi na plaće te parafiskalni nameti za snažniji razvoj privrede neophodno je povećati produktivnost.

"Upravo je povećanje produktivnosti privrede neminovno kao jedan o ključnih izvora rasta", kazao je prof.dr. Vjekoslav Domljan.

U okviru radnog djela, delegati Skupštine UPFBiH jednoglasno su usvojili izvještaj o radu UPFBiH, kao i finansijski izvještaj za prošlu godinu koji je preznetirao direktor UPFBiH Mario Nenadić. Delegati su, također, razmatrali i usvojili plan rada i finansijski plan za tekuću 2024. godinu.



Delegati Skupštine i gosti, naglasili su važnost unaprjeđenja trilateralnog dijaloga – vlasti, poslodavaca i sindikata s ciljem jačanja sistema i poslovnog okruženja u FBiH, a posebno uprovođenju fiskalnih reformi, izmjena zakona o doprinosima, dohotka, dobiti, minimalnoj plaći, ali propisa iz oblasti zdravstvenog osiguranja, posredovanja u zapošljavanju, trgovini, zaštiti na radu i ostalo.

Svi sudionici su saglasni da je neophodno jačati reprezentativno udruženje poslodavaca, te su pružili veliku podršku u daljnjem radu Udruženja i najavili zajednički rad na unaprjeđenju poslovnog ambijenta u FBiH.

Održan sastanak rukovodstva UPFBiH sa privrednicima sa područja SBK



Udruženje poslodavaca u Federaciji Bosne i Hercegovine, u saradnji sa Udruženjem poslodavaca Srednjobosanskog kantona organizovalo je sastanak privrednika sa područja ovog kantona, na kojem su predstavnicima kompanija predstavljene aktivnosti i prioriteti rada UPFBiH usmjereni

na smanjenje cijene rada i rasterećenje privrede.

“Kroz organiziranje ovih sastanaka želimo direktno od privrednika dobiti informacije o poslovnom ambijentu, eventualno novim problemima, ali i kreirati prijedloge za rješavanje postojećih problema u privredi. Zajedničkim aktivnostima želimo poboljšati poslovni ambijent na nivou FBiH, ali i na nivou kantona, u okviru kantonalnih nadležnosti u oblasti privrede. Fokus Udruženja poslodavaca u FBiH su fiskalne reforme, odnosno rasterećenje cijene rada i liberalizacija tržišta rada. Činjenica je da se susrećemo sa hroničnim nedostatkom radnika na domaćem terenu te pokušavamo omogućiti, usvajanjem seta zakona, zapošljavanje studenata, osoba sa invaliditetom, penzionera koji žele i produženi radni angažman, te stranaca”, kazao je predsjednik UPFBiH Adnan Smailbegović.

Na sastanku je naglašeno da je osim neophodnih reformi kada su u pitanju nameti na plaće, kroz donošenje novih zakona o doprinosima i dohotku u FBiH, zakonskih odredbi o liberalizaciji tržišta rada, za kvalitetniji poslovni ambijent neophodno reformisati postojeći sistem zdravstvenog osiguranja, ali i obrazovanja. Poslodavci iz SBK su naglasili potrebu ukidanja i smanjenja parafiskalnih nameta, koji dodatno opterećuju poslovanje kompanije.

Direktor UPFBiH Mario Nenadić naglasio je da je uspostavljanje bolje i čvršće saradnje među privrednicima u FBiH te zajednički rad sa vlastima na poboljšanju poslovnog ambijenta cilj ovakvih i sličnih okupljanja privrednika i obrtnika u FBiH.

Ove aktivnosti se provode u okviru projekta EISE koji finansira EU.

Predstavници UPFBiH održali sastanak sa ministrom komunikacija i prometa BiH



Predstavnici Udruženja poslodavaca u FBiH, predsjednik Adnan Smailbegović i direktor Mario Nenadić, održali su 02.04.2024. godine sastanak sa ministrom komunikacija i prometa Bosne i Hercegovine Edinom Fortom.

Predstavnici Udruženja poslodavaca u FBiH čestitali su napredak Bosne i Hercegovine na europskom putu kroz nedavno odobreno otvaranje pregovora. Također su naglasili važnost procesa digitalizacije u Bosni i Hercegovini za poslovne procese, inicijative i otvaranje Bosne i Hercegovine kroz najavljenju digitalizaciju procesa.

Predstavnici UPFBiH su ministru Forti ukazali na ključne prioritete poslodavaca u ovoj godini, a to su unapređenje poslovnog okruženja kroz smanjenje cijene rada i liberalizacija tržišta rada i radne snage.

Udruženje poslodavaca u FBiH kao reprezentativno Udruženje u prethodnom periodu obišlo je i trenutno obilazi općine u Federaciji BiH i u kontaktu sa poslodavcima i vlastima analizira i ažurira prioritete svoga rada.

Vezano za nadležnosti Ministarstva komunikacija i prometa BiH poslodavci posebno naglašavaju važnost europskih integracija, proširenja tržišta, unapređenja pitanja komunikacija, transporta, prevoza roba i usluga, i dr. Posebno je istaknuta važnost poboljšanja

infrastrukture u Tuzlanskom regionu, a što je naglašeno na skupovima Udruženja poslodavaca u FBiH u Tuzlanskom kantonu tokom prethodnog mjeseca. Privrednici u Tuzlanskom kantonu, kao jedan od najvažnijih prioriteta naglašavaju rješavanje pitanje infrastrukture u kantonu, ali i regionalno, međuentitetski i prekogranično.

Ministar Forto je pokazao veliko razumijevanje i interes za rješavanje problema poslodavaca u FBiH i predložio je zajednički rad i saradnju na pitanjima digitalizacije kroz projekat „Digitalna Europa“, uključivanje i učestvovanje na konferenciji u Tuzli početkom idućeg mjeseca, kao i zajednički rad sa drugim nadležnim ministarstvima i institucijama na pitanju liberalizacije uvoza radne snage u BiH.

Predstavljen projekat „Jačanje zaštite ljudskih prava u aktivnostima poslovnog sektora u BiH“ kojeg provode UPFBiH i UPRS



Cilj dvogodišnjeg projekta "Jačanje zaštite ljudskih prava u aktivnostima poslovnog sektora u Bosni i Hercegovini" doprinijet će zaštiti ljudskih prava u Bosni i Hercegovini promocijom provedbe Smjernica Ujedinjenih naroda o poslovanju i ljudskim pravima unutar poslovnog sektora u BiH i EU smjernicama o društveno odgovornom poslovanju, rečeno je u Sarajevu na predstavljanju projekta.

Projekat provodi Udruženje poslodavaca u FBiH u saradnji sa Unijom poslodavaca RS od februara ove godine, a finansira ga Europska unija.



Prezentaciji projekta "Jačanje zaštite ljudskih prava u aktivnostima poslovnog sektora Bosni i Hercegovini" prisustvovala je ombudsmanka za ljudska prava BiH Jasminka Džumhur, zamjenica Ministra za ljudska prava i izbjeglice BiH Duška Jurišić, predstavnik Saveza samostalnih sindikata BiH Samir Kurtović, predstavnici Direkcije za europske integracije BiH, Ministarstva rada i socijalne politike FBiH, Ministarstva turizma i zaštite okoliša FBiH, predstavnici sindikata, organizacija civilnog društva, mediji i drugi.

Svi prisutni su istaknuli podršku Projektu, naročito ističući zadovoljstvo što su upravo udruženja poslodavaca u BiH inicirala i provode projekat zaštite ljudskih prava u kompanijama, ali i u poslovnom okruženju generalno.

"Želimo povećati kapacitete i perspektivu kompanija u BiH i poboljšati načine na koje provode nadzor kada je u pitanju zaštita ljudskih prava u provedbi svojih aktivnosti ili njihovih lanaca snabdijevanja. Kroz ovaj Projekat želimo unaprijediti provedbu, ali i sadržaj zakonodavstva u vezi sa zaštitom ljudskih prava u poslovanju, u vezi s usklađivanjem sa EU smjernicom o društveno odgovornom poslovanju, Smjernicama UN o poslovanju i ljudskim pravima te poticanjem dinamike reformi koje BiH treba provesti na svome putu ka punopravnom članstvu u EU. Brojni su stručni i drugi izazovi pred BiH na ovom putu, a očekivanja poslodavaca su da će realizacijom ovog projekta poslodavci svoja znanja i stečena iskustva, u konačnici ugraditi u kvalitet svojih proizvoda i usluga, što će poboljšati konkurentnost naših kompanija na unutrašnjem i međunarodnom tržištu", kazao je direktor UPFBiH Mario Nenadić.

Kako je istaknuto, u okviru realizacije projekta bit će osnovana Akademija za društveno odgovorno poslovanje, kao obrazovni program za kompanije o uključivanju ljudskih prava u svakodnevno poslovanje i upravljanje.

"U okviru Projekta realizirat ćemo deset regionalnih radionica, odnosno, edukacija i deset online edukacija za oko 500 predstavnika višeg i srednjeg menadžmenta u kompanijama, kao i predstavnika sindikata i vlasti, tokom kojih će se učesnici educirati o stručnim znanjima o uticaju poslovanja na ljudska prava i praktičnim alatima i smjernicama koji će pomoći kompanijama da imaju veći pozitivan uticaj na zaštitu ljudskih prava u BiH", kazala je sekretar UPFBiH Mersiha Jusić tokom prezentacije Projekta.

Osim toga, planirano je i razvijanje mobilne aplikacije (APP), kao online resursnog centra za podršku kompanijama u provođenju nadzora u zaštiti ljudskih prava.

"Realizacijom projekta će se uspostaviti inkluzivni dijalog između socijalnih partnera,

poslodavaca, sindikata i javnih institucija, o jačanju društveno odgovornog poslovanja i poboljšanju implementacije Smjernica UN o poslovanju i ljudskim pravima u BiH te usvojiti deklaracija o predanosti poslovnog sektora BiH Smjernicama UN o poslovanju i ljudskim pravima", kazala je Jusić.

U sklopu projekta bit će urađena analiza i izvještaj o implementaciji Smjernica UN o poslovanju i ljudskim pravima u BiH.

"Vjerujemo da ćemo provodeći sve planirane aktivnosti projekta smanjiti negativni uticaj poslovnih aktivnosti na ljudska prava, uključujući pitanja vezana uz okoliš, radnu snagu i društvo i visoko ih pozicionirati te povećati zagovaračku snagu za realizaciju predložene politike", naglasila je Jusić.

UPFBiH osniva Akademiju za društveno odgovorno poslovanje

Nakon Tuzle i Sarajeva Projekat „Jačanje zaštite ljudskih prava u aktivnostima poslovnog sektora u Bosni i Hercegovini“ predstavljen je predstavnicima poslovne zajednice, institucija vlasti, sindikata, akademske zajednice, nevladinih organizacija i medija u Vitezu.



Kako je istaknuto tokom prezentacije, cilj Projekta „Jačanje zaštite ljudskih prava u aktivnostima poslovnog sektora u Bosni i Hercegovini“ je unapređenje zaštite ljudskih prava u Bosni i Hercegovini promocijom provedbe Smjernica Ujedinjenih naroda o poslovanju i ljudskim pravima unutar poslovnog sektora u BiH i EU smjernicama o društveno odgovornom poslovanju.

Projekat, koji traje dvije godine, provodi Udruženje poslodavaca u FBiH u saradnji sa Unijom poslodavaca RS od februara ove godine, a finansira ga Europska unija. Realizacijom projekta povećat će se kapaciteti i perspektiva kompanija u BiH i poboljšati načini na koje provode nadzor kada je u pitanju zaštita ljudskih prava u provedbi poslovnih aktivnosti ili lanaca snabdijevanja.



„Kroz ovaj projekat želimo unaprijediti provedbu, ali i sadržaj zakona koji se odnose na zaštitu ljudskih prava u poslovanju, u vezi s usklađivanjem sa EU smjernicom o društveno odgovornom poslovanju, smjernicama UN o poslovanju i ljudskim pravima te poticanjem dinamike reformi koje BiH treba provesti na putu ka punopravnom članstvu u EU. Vjerujemo da će realizacijom ovog projekta poslodavci unaprijediti znanja, steći nova iskustva, te ih u konačnici ugraditi u kvalitet svojih proizvoda i usluga, što će poboljšati konkurentnost bh. kompanija“, istaknuo je Mario Nenadić, direktor UPFBiH.

Projektnim aktivnostima predviđeno je osnivanje Akademije za društveno odgovorno poslovanje, kao obrazovnog programa za kompanije o uključivanju ljudskih prava u svakodnevno poslovanje i upravljanje.

„U okviru Projekta realizirat ćemo deset regionalnih radionica i deset online edukacija za oko 500 predstavnika višeg i srednjeg menadžmenta u kompanijama, kao i predstavnika sindikata i vlasti, tokom kojih će se učesnici educirati o stručnim znanjima o uticaju poslovanja na ljudska prava i praktičnim alatima i smjernicama koji će pomoći kompanijama da imaju veći pozitivan uticaj na zaštitu ljudskih prava u BiH“, kazala je Mersiha Jusić, sekretar UPFBiH tokom prezentacije Projekta.

Također je planirano kreiranje mobilne aplikacije, kao online resursnog centra za podršku kompanijama u provođenju nadzora u zaštiti ljudskih prava.

„Realizacijom projekta će se uspostaviti inkluzivni dijalog između socijalnih partnera, poslodavaca, sindikata i javnih institucija, o jačanju društveno odgovornog poslovanja i poboljšanju implementacije Smjernica UN o poslovanju i ljudskim pravima u BiH te usvojiti deklaracija o predanosti poslovnog sektora BiH Smjernicama UN o poslovanju i ljudskim pravima“, naglasila je Jusić.

U sklopu projekta bit će urađena analiza i izvještaj o implementaciji Smjernica UN o poslovanju i ljudskim pravima u BiH.

„Kroz provedbu planiranih aktivnosti projekta smanjit će se negativni uticaj poslovnih aktivnosti na ljudska prava, uključujući pitanja vezana uz okoliš, radnu snagu i društvo i visoko ih pozicionirati te povećati zagovaračku snagu za realizaciju predložene politike“, naglasila je Jusić.

Delegacija Udruženja poslodavaca u FBiH posjetila Lucius i izrazila svoju podršku



Nakon obilaska proizvodnog i prodajnog sektora prilikom kojeg su stekli jasniji uvid u principe rada poduzeća Lucius, predstavnici Udruženja su održali kratak sastanak sa direktorom Matijom Marjanovićem kojem su pružili punu podršku u daljnjem radu.

"Shvatili smo da je ovo relativno mlada kompanija koja ostvaruje značajne rezultate na tržištu. Pomalo neobičan core business kompanije motivirao nas je da, u kontekstu projekta zaštite ljudskih prava kojeg promoviramo, vidimo koji su to aspekti koje određena društveno odgovorna kompanija može prezentirati kao uhodane vrijednosti. Na licu mjesta danas smo se imali priliku uvjeriti da i naše kompanije znaju i mogu primjenjivati europske vrijednosti. Pozvali smo Lucius da nastavi svoj razvoj i kroz Udruženje kako bi u budućnosti lakše osigurao uvozno-izvozne poslove i podizanje svojih standarda", rekao je ovom prilikom direktor UPFBiH Mario Nenadić.

"Izuzetno mi je drago što UPFBiH prepoznaje naš rad te što su nas gospođa Jusić te gospoda Smilbegović i Nenadić posjetili baš kada prolazimo kroz težak period i kada smo izloženi raznim pritiscima. Lijepo je kada si prepoznat u širem poslovnom okruženju i kada ti netko od mjerodavnih sam pokuca na vrata da te pita kako si, s kakvim se problemima u poslovanju susrećeš i pruži svoju podršku", istaknuo je direktor Luciusa Matija Marjanović.

UP BiH trenutno aktivno radi na projektu "Ljudska prava u poslovnom okruženju" kroz koji su promovirane europske vrijednosti, a koji je financiran od strane delegacije EU.

Održan sastanak sa predstavnicima produksijske kuće Deblokada



Na inicijativu produkcijske kuće Deblokada, direktor Udruženja poslodavaca u FBiH Mario Nenadić i sekretar UPFBiH Mersiha Jusić održali su sastanak sa predstavnicima Deblokade, odnosno redateljicom Jasmilom Žbanić i producentom Damirom Ibrahimovićem.

Tokom sastanka predstavnici Deblokade naglasili su važnost filma i filmske produkcije u razvoju i promociji ukupnih aktivnosti u svakom društvu pa tako i u poslovnom okruženju u BiH.

Predstavnici Udruženja upoznali su predstavnike Deblokade o ključnim izazovima u funkcioniranju poslovne zajednice i naporima koje Udruženje ulaže sa ciljem unapređenja stanja.

Razgovaralo se ovom prilikom i o realizaciji projekta dodjele nagrade „Emerik Blum“ najboljim privrednicima u Federaciji BiH, kao i o pripremi i produkciji dokumentarnog filma „Blum“ koji govori o životu i životnom djelu velikog privrednika Emerika Bluma.

Zaključeno je da će se nastaviti saradnja na implementaciji ova dva projekta Udruženja poslodavaca u FBiH i Deblokade.

UPFBiH: 40 polaznika uspješno završavaju obuku za zapošljavanje osoba sa invaliditetom na otvorenom tržištu rada

Udruženje poslodavaca u Federaciji Bosne i Hercegovine početkom ove godine započelo je četveromjesečni projekat „Obuka za zapošljavanje osoba sa invaliditetom na otvorenom tržištu rada“. Projekat finansira Federalni zavod za zapošljavanje, a 40 osoba sa invaliditetom podijeljenih u dvije grupe educiraju se kroz četiri modula, kako bi unaprijedili svoja znanja i vještine za otvoreno tržište rada.

„Nakon uvida u situaciju u FBiH kada je u pitanju radna snaga, zajedno sa nadležnim institucijama UPFBiH je pokrenulo aktivnosti koje imaju za cilj da sve kategorije stanovništva koje su do sada bile isključene iz procesa rada i zapošljavanja uključimo na tržište rada. Tom prilikom smo identificirali osobe sa invaliditetom kao grupu koja je zainteresirana za uključivanje u aktivno tržište rada. Činjenica je



da kao društvo nismo napravili dovoljno kvalitetan iskorak, kada je u pitanju zapošljavanje osoba sa invaliditetom i sa tim ciljem smo konkurisali kod Federalnog zavoda za zapošljavanje sa ovim projektom. Poštujući činjenicu da svaka osoba sa invaliditetom ima sačuvan određeni dio radnih sposobnosti, naš cilj je bio im približimo tržište rada u FBiH i da ih povežemo sa poslodavcima, potencijalno zainteresiranim za njihov rad. U ovome trenutku postoji interes poslodavaca da zaposle osobe sa invaliditetom i kroz ovaj projekat UPFBiH će sigurno povezati dio polaznika obuke sa poslodavcima kako bi ih zaposlili“, kazao je Mario Nenadić, direktor UPFBiH.

On se zahvalio Federalnom zavodu za zapošljavanje te izrazio uvjerenje da je ovo početak snažnijih aktivnosti na posredovanju u zapošljavanju od strane Zavoda.

„Želimo pohvaliti i napore Ministarstva za rad i socijalnu politiku FBiH i ministra Adnana Delića koji je jako puno uradio na usvajanju zakona o osobama sa invaliditetom gdje upravo ova



aktivnost bila jedan od ključnih ciljeva. Zahvaljujemo udrugama ProReha i Sumero čiji je angažman bio izuzetno značajan i koristan za realizaciju projekta, a posebno smo zahvalni polaznicima koji su pokazali veliki interes i želju da uče i stiču nova znanja i vještine“, naglasio je Nenadić.

Nakon četveromjesečne obuke, polaznicima su dodijeljeni certifikati o savladanim znanjima i vještinama, a u okviru projekta učesnici će obići i pogone kompanije „Inside by Ećo“ kako bi se upoznali sa proizvodnim procesima.

Mirza Smajić je po struci knjigovezac, invalid sa 60 posto invalidnosti. Do sada je povremeno radio različite poslove.

„Za projekat sam čuo preko Udruženja 'Sumero' čiji sam član i koji su me pozvali. Odazvao sam se i jako sam sretan zbog toga. Ovo je odličan projekat koji mi je dao dodatno znanje, vještine, ali i samopouzdanje, dodatnu motivaciju za rad. Vjerujem da ću nakon ovoga uspjeti brzo naći posao, jer želim na radnom mjestu pokazati naučeno“, kaže Smajić.

Amila Novalija već dugo prijavljena kao nezaposlena osoba na birou za zapošljavanje.

„Obuka koju smo prolazili u protekla četiri mjeseca mi je jako puno koristila. Sretna sam jer sam savladala vještine koje unapređuju moja znanja i vještine, od onih osnovnih kao što je ponašanje na poslu pa do komunikacije, individualnog rada i rada u timu. Posebno želim zahvaliti našim predavačima koji su se potrudili da nam prenesu svoje veliko znanje i iskustvo“, ističe Novalija.

Vedad Vajzović, predsjednik „ProReha“, udruženja za profesionalno osposobljavanje, prekvalifikaciju i rehabilitaciju osoba s invaliditetom u FBiH ističe veliki trud i zalaganje polaznika.

„U ovom ovom projektu smo angažirani sa ciljem da identificiramo, procijenimo, educiramo i stvorimo preduslove za određeni broj osoba sa invaliditetom, koje su prijavljene na evidenciji biroa za zapošljavanje, kako bi našli svoje mjesto na otvorenom tržištu rada. Ovdje se potencira otvoreno tržište rada, jer većina aktivnosti kada su u pitanju osobe sa invaliditetom provodi se u okviru zaštitnih radionica i pod posebnim uslovima, što dodatno diskriminira osobe sa invaliditetom i ne pruža im punu inkluziju u društvo i otvoreno tržište rada na kojem oni mogu pokazati svoj puni potencijal“, naglasio je Vajzović.



Nova članica UPFBiH - Udruženje "Društvo umjetnika Deblokada"

Osnovao 1997. godine od strane režiserke Jasmile Žbanić i producenta Damira Ibrahimovića, "Deblokada" se etablirala kroz svoju ostvarenu kinematografsku produkciju koja nije samo zbir filmova, već i oličenje specifičnog pogleda na svijet koji film prepoznaje kao važan korektiv socijalne anomalije. Sam naziv „Deblokada" dolazi iz sarajevskog ratnog rječnika devedesetih godina: građani grada koji je pretrpio najdužu opsadu u historiji modernog ratovanja sanjali su o danu kada će opsada biti ukinuta. Pa ipak, i nakon završetka rata i opsade, ostaci rata ostali su oličeni u raznim političkim, ekonomskim i psihološkim blokadama, koje su nastavile razbijati poslijeratnu Bosnu i Hercegovinu.

Više o Udruženju pročitajte [OVDJE](#).

Nova članica UPFBiH - Ovnak d.o.o.

Ovnak je vodeća distributerska kompanija u Bosni i Hercegovini specijalizirana za kozmetičke i kemijske proizvode te robu široke potrošnje za kućanstvo. Portfolio sadrži više od pedeset brendova i širok asortiman proizvoda, ali i djelatnosti, što omogućuje ispunjavanje različitih potreba potrošača.

Ovnak distribucija, kao dio Ovnak grupacije, u čijem sastavu su i autokuće (Citroen, Peugeot, Dacia, Renault, VW), dvije benzinske pumpe te farma, svoj poslovni put gradi na marketinškom pristupu tržištu. Jedan od ključnih faktora uspjeha je sposobnost efikasnog upravljanja lancem snabdijevanja.

Više o kompaniji pročitajte [OVDJE](#).



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba